

四庫全書

集部

欽定四庫全書

澗泉集卷十二

宋 韓洄 撰

七言律詩

寄趙農丞

祝融紫蓋瀟湘水已是離騷更著秋
仕宦有時還潦倒人生何地不周游
久持庾節身長健纔乏奚囊意必道
我老重加交舊少望餘風葉冷啾啾

趙簿留飲望城裏海棠因思履道且寄民瞻

相望海棠思故人最高臺是北城闌看來先自花饒笑
興到從他酒入唇語燕既歸驚作社盟鷗何在且行春
妙年秀發如君少桃李紛紛只世塵

再寄吳推官

中秋天氣桂花發正爾商量一首詩忽喜得書開復看
相思如夢見還疑偶然寫句封題去何用成篇和答為
佳處因君又重賦月明葉落滿庭垂

寄彥升九日前一日飲其家

稻田陂水菊花天
新築軒窗醉酒邊
情味故人如昨日
襟期閒客又今年
沉思節序俱同夢
賸賞風光甚欲仙
屋上青山展圖畫
鴈翻秋影下平川

趙履常湖北倉經過因話昔惘然久之

俛仰之間又一年
舊遊新話兩茫然
驚心會聚初何所
滿意飛騰不在邊
眇眇桃宮聊記取
我我芸閣久迴旋
歲寒玉雪清冰地
纔著纖塵是市廛

寄周正字

長洲茂苑關門睡忘却蓬山夢裏遊爾雅一生無濁見
離騷千古有清愁澇田檢放難終歲寒事經營易得秋
欲寄潛鱗尋過翼望窮雲海復悠悠

時子其泊城外姚寺因問訊之

隔河城裏撲京塵占得僧窗景自新酒泛椒花知逼歲
瓶簪梅蘂欲爭春乾坤可是無閒客湖海元非有旅人
老去壯心空不已雪花垂地雨尤真

寄張饒縣

漣漪清浸碧崔嵬玉水靈山夕照開陶令風流非偶爾
孟嘉嘲笑亦何哉偶因別乘開吹帽想復同僚正舉盃
去歲相從最為樂黃花明日又徘徊

二十三日宿舒料院家因以寄料院

書林猿鶴依然好風月飛翔正嘯啼下榻留連又家塾
輿籃來往幾芳蹊但知舊隱依清樾想見新班照紫泥
小醉微吟因一寄斯民壽域待公躋

寄林祕書

雍篳初熟二螯肥空水生寒脫葉稀北闕既嘗糜爵服
西疇但且理牛衣由來意氣多忘老到底功名却欠歸
冰玉故人真耐久湖山相望翠烟霏

駿仲小三哥調選言還併寄巽伯上舍

麗澤之風又一傳可堪諸老久沉泉逢人盡道能尊事
逐物那知不變遷邦邑祠堂應自若朝家卹典為誰然
相思相見還相別難弟難兄更著鞭

次韻仲至雪句兼寄樸翁

長安一片雪冬深勝士騷人只苦吟可是頓忘它日志
也非深惜此時心細看北闕吳山下暗想西湖葛嶺陰
搜到詩家難到處掉頭應不管寒侵

寄趙十監試

案此詩二首
其一見五律

夜涼月裏話東征傾耳呼猿洞水聲玉室金堂元避世
鱸魚蓴菜豈懲羹舉聞箇箇三年試雲路家家萬里程
在我能為古之制裕陵圖治重宗盟

寄趙成父鄱陽就養

薦福碑前水滿湖
芝山携酒看來無
老閒就養身須逸
歲晚逢時興不辜
岸幘以來誰在座
課經而后自開爐
春稍迤邐梅須好
安得相從一笑呼

寄趙正字秀倅員外置

僅得相從又隔州
梅邊花信尚悠悠
蒼茫有句雖能寄
黯淡無觴可奈搜
須信山林愁不密
豈云江海要橫流
邠丹仕宦應聊爾
歲月空催人白頭

寄劉小山武子老丈

秦淮東畔得詩人踏盡前朝陌上塵寺外殘陽見光宅
苑迷芳草憶臨春空餘王氣金陵古猶帶歌聲玉樹新
羸馬倦童應獨徃舊時明月恐傷神

翠微秋影浪吟時一片才情杜牧之不望上天容此老
只憂無地着群兒歲華荏苒踈音信人事淒涼有別離
日暮江東雲合處小山叢桂是吾師

寄鞏仲至

清言猶可誦君詩詩落在人間一任之霜後錢塘寒自覺

臘前閩粵煖還宜坐搔禿髮甦殘困俯援長毫寫舊思
二雅以還情義短隴梅欲寄未開枝

寄斯遠

夜深踏月過章邱樹影吹涼滿地流不覺身從城市到
以為人共廣寒遊數家小屋全然靜一點浮雲也自收
天下中秋誰有比歸來清夢尚悠悠

寄永嘉葉丈以昌甫韻

誰云遣興莫過詩詩到清愁只自知老去山林能幾許

近來香火復奚為，隨身作務何須較。
脫手成文不費辭，宿覺庵高飛夢到一春花柳更無私。

次韻趙路分寄昌甫

金仙寺下章泉水，幽討荒尋夢亦清。
半世奉祠非祿隱，窮年稽古只書生。
深居肯以它人重，嬾出應於外物輕。
好是二徐來問學，更欣同姓得詩聲。

寄昌甫斯遠

重陽未見黃花發，滿眼青山如故人。
且把長言索佳句，

應搔短髮任閒身
籬邊千載陶元亮
谷口今時鄭子真
屈指交遊久零落
勿云情異與心親

寄李半村商叟老丈

不到前村五六年
春帆便合上溪船
桃花浪暖魚初出
燕子風輕柳欲眠
海內知名今有幾
古來是事總如然
茶山衣鉢分明在
相望閒吟寄謫仙

寄王幹

閩粵榕青蕉子紅
年光當付酒盃中
推愁顧此歡無策

作興從渠醉有功，
犴獄贅臺居上幕。
藩方連帥近元戎，
雨崑風雪應回首。
我老窮山更憶公。

數年不與李商叟書，
忽書來一詩寄之。

正始之風固寂寥，
茶山猶有半村高。
靜觀世變慵招隱，
閑賦詩章定廣騷。
深信老懷能自適，
遙知好事不常遭。
秋來醉擁殘書臥，
鼻鼾吹紅氣轉豪。

寄昌甫

章丘死矣章泉老，
經月何為不寄詩。
世事易教閑裏過，

古心難以衆人知，莫因開徑思來往。
只合深居歎別離，矗矗靈山終不變。
薰城吹角暮雲垂。

寄謝耕道

白蓮庵下犁春屋，正是吳山大隱坊。
一任車塵飛不到，半生詩卷獨難忘。
眼明貴近清樽富，心折交遊禿鬢涼。
十里芰荷湖水外，海濤秋浪更茫洋。

寄錢丈季卿

儘有溪山儘可閒，竹符英節幾年間。
竟歸問舍應游泳。

將老擇鄉誰往還獨笑闊踈誠易久皆云高遠愈難攀
東風又綠天涯草百事何勞一破顏

寄葉正則丈

宿覺庵高何處山松風江月幾人間可曾著眼力耕外
也且游心研滴間春冷種花開較少年饑求飽食猶艱
湖東渾是江南爾一崦一重還一灣

寄昌甫

梅花開盡冬亦盡雪後春來猶苦寒年事其誰無老境

時情徒自有儒冠
林虛磴道歸深谷
塘決溝流起素湍
鷹掠晚風鴉泊霧
一軒苔竹且加餐

初二日寄昌甫

病餘無緒可從容
健羨人能下上同
秋冷芙蓉才弄日
晴烘嵒桂又吹風
枯榮車馬留還去
喧寂壺觴散復空
老意苦心徒漫興
玉溪雲薄有來鴻

寄趙帳官

滿架葡萄遶屋蓮
久齋深靜想依然
地無鷄犬身逾逸

池有龜魚意自便客不來時風雨過我無營處水浮煙
短籬之外皆城市那許飛塵到簡編

寄廣南教運管

且把閒詩寄故人嶺梅冬近一枝新望窮海外應身健
心折江東入夢頻我道詞章非醉墨誰思勲業是知津
因風遠訊弦歌客好對孤芳說隱淪

向親回自宣城出示十二姪送行詩次韻寄之
歸來誰作送行詩山疊昭亭水宛溪蠟屐定須同探賞

錦囊贏得是提携，索居野外薰風起。
回望天涯落日低，往事舊遊空太息。
老身今已分扶犁。

寄丁夔州

夔子遙遙古信州，向來懷玉得賢侯。
江湖烟樹開方面，巴峽樓臺占上頭。
掌握機權因世故，心思隱膜為民憂。
儒家共仰丁寬易，老手官還侍冕旒。

寄耕道謝犁春

宦塵偷眼望孤山，幾箇吟人得往還。
德久堯章前次是。

晉仙銛樸後來間大都壽夭元無定只這衰榮甚等閒
說與一犁春雨謝離憂江上已蒼顏

寄徐丈和卿

逍遙閣上老彌明不染京華只自清
脚底湖山難間隔眼前朝市易紛爭
巽巖耆舊交遊契麗澤淵源正大情
白髮長身無恙不冷泉天竺聽秋聲

贈任行甫

一自春風龍井遊
遁庵僧寺最清幽
山行步穩同飛蓋

水際望窮時渡舟但覺眼前多逸興豈知別後有深愁
霜天邂逅武夷路黃葉滿川空白頭

贈葉監元密

兒時聞說卞山翁宗主文章翰墨功今日園林應自好
當年冠蓋定誰同獨驚再世登門舊共喜重孫有祖風
收拾世科歸相業老懷何幸復相從

贈劉信卿

從來人物數江西地占廬陵盛一時細說交游皆我敬

豈期邂逅得君知金堂玉室欣同集鴈塔龍頭合共期
文采珊瑚才器遠老懷風味為哦詩

二月二日贈杜晦之

雨收晴色弄雲陰昨日鷺湖山下行四世交游嗟舊好
兩人相與締新盟閒身終歲悠悠過華髮經春種種生
矯首武夷山六曲安仁有酒定同傾

贈鄭處晦

人間臭味易相尋誰復詩騷著意深自古高吟唯洛下

一時勝事說山陰
閒看禪月臺前水
笑倚靈山閣外林
安得朱絃與疏越
與君三歎有遺音

贈季倫伯臯叔姪

兩龔二阮古來希
古月之家喜得之
邂逅數年成契闊
因仍幾日復追隨
有詩有酒湏人勝
無命無才亦我宜
華髮蒼顏勝強健
霜清山影鴈參差

贈孫叔晦解元澈

春風花下一杯酒
瀟灑玉溪溪上頭
醉裏只知傾意氣

別來誰識訴憂愁
霸王城畔看遺跡
歸鴈亭邊憶勝遊
他日相逢更何許
夜深燈火記綢繆

贈蔡八

休論南渡恐傷神
歲月推遷少此人
已解捐軀言國事
可能忘命掃邊塵
賈生痛哭初何意
壯士長歌豈隱淪
我在玉溪徒自老
杜門今度幾秋春

十一日再贈器之

浮家泛宅玉溪邊
小泊茶樓又過年
山郡野花共酒盞

天街官柳望吟篇平吞餘子價何待傾倒諸公譽正延
日復故疆湏老手步歸青鎖伴金蟬

戲贈成季

案此詩二首其一見六言絕句

尋常盡月無人問邂逅今朝有客留酒到醉深纔得味
詩因吟好却生愁夕陽倒射亂雲合淺水未乾飄葉浮
揮手薰風只如此角聲孤起在城樓

贈鄭尉

玉溪夜飲十年時月底群山翠作圍盡吸煙霞歸酒盞

但知風露著人衣飄零如我空攀桂邂逅從公合采薇
南北兩峯元自好長安城裏暗塵飛

贈晁大令尹

少回餘刃到琴歌便覺民生政以和撫字自然成訟簡
豐登元不為苗多溪山有暇乘軒出僚友常時載酒過
我亦久為踈散客與君吟嘯欲如何

贈王理曹

行遍山巔與水涯南遊何地說中華故人又見君三世

薄宦休論我一家邂逅薰香因把酒從容附火試煎茶
典刑文顯誰能信搔首踈梅看雪花

贈俞司戶

春風苑路百花枝猶記青袍上第時喜事為君嘗把酒
交情雖我亦哦詩傳礪梅畔看新築鷺嶺松間覓舊題
別後相逢乃如此人生難得是襟期

送孫司戶

再世論交意已親會逢還在葛谿濱同流要是涇隨渭

絕俗何殊玉與珉
落珮倒冠誰避地
垂紳搢笏自知津
下言只有長相憶
乳燕鳴鳩又晚春

柬鄭一

夕陽門外是南齋
望斷山顛與水涯
曉去挾書雖雅放
晏歸不飲也談諧
新池喜種蓮當戶
舊逕慵鋤草沒堦
約綽郊居遂初賦
只消黃帽與青鞵

柬周次公

風花煙草滿春山
五載相望各掩關
奮迅詞場君未艾

棲遲田里我長閒
升沉交舊今多少
中外親知昔往還
隨俗何如絕流俗
幾回吟醉睡其間

呈李權郡

澗谷春前已見梅
愛閑能有幾人來
香收冷蘂依篁竹
影落孤根瑣翠苔
吟動敢因呈和句
酒闌猶記得隣杯
謫仙今在黃堂裏
還許尋芳使醉陪

薛農寺連月不相見
雪中思其所居對湖山
之勝一詩呈之

牕外湘山雪正奇不知曾費幾篇詩我窮正墮京城日
公達宜居臺省時春近定須歸柳葉臘殘應弗問梅枝
他年拂袖岷峨去好話江東有客思

朱卿入雨嵒本約同遊一詩呈之

雨嵒只在博山隈往往能令俗駕回挈杖失從賢者去
住庵應喜謫仙來中林卧壑先藏野盤石鳴泉上有梅
蚤夕金華鹿田寺斯遊重省又遐哉

丁使君和昌父詩朱卿亦有句次韻呈之

節物推遷還獻歲紛紛如看霧中花春盤又見菜纖手
臘酒已傾錫膠牙山野寄吟寧漫興禁林有和實驚嗟
韋蘇州集多酬唱亦有州民釣客家

呈趙清江

曾得清詩和吾句江山吳楚每相望垂頭白髮蕭蕭短
到眼青春萬萬長萬里御風游汗漫一歌此日對滄浪
不須更把論文酒今是前非枉斷腸

呈仲至

雪片纔飛冬已深詩家何在索沉吟軒裳縱好從他意
筆硯雖荒尚此心細撥爐灰空自處緩迴溪棹合相尋
臘前年後梅多少愁絕孤山處士林
三年之詩強半山中之詩也處朝市而作此言謂之不安可乎要是詩非可以強吟者也老矣尚有擇哉謾記

呈王十二丈

三畏堂中一老人青編黃卷養精神孜孜為善學時習
兀兀窮年德日新常以路遙難請益且於坐下得親仁
淵哉和靖相傳處多少聲名聳搢紳

呈昌甫

白髮垂垂訪故人從渠今昔話頭新
留連樽酒空搔首點定書文且放身
見說得泉尋窈窕每經來路喜嶙峋
誰知赤葉青林外又見梅花是小春

呈晁元默

九年不見新詩句聞過名山得勝遊
步轉高寒瀟岳聳眼明橫絕大江流
留連朔雪僧牕夜邂逅西風客舍秋
當使曾襟更陶寫乘時談笑上瀛洲

呈朱卿

謫仙曾昔冠詞場一笑巖花滿意芳
月裏直攀蟾桂種風前常惹御爐香
從他九艷傾城色本自高名觀國光
少為清秋試題品五雲歸路鶴天長

弭節高溪又一年功名終古畫凌煙
經筵星拱雲霄上言路風行雨露邊
早達未應真勇退晚成當不負臚傳
叢生桂處秋光好磅礴閒心且醉眠

又

乘流遇坎過饒陽不見長安且惜芳酒到此時瓶欲罄
詩來明月韻偏彊無端醉裏乾坤大有底吟邊歲月忙
一笑漁樵與爭席春風何事不彷徨

三衢史教授留館

一再相逢把酒杯老年懷抱為君開溪山有味還飛雪
草木何心欲放梅共喜醉言方繾綣又愁別後已徘徊
且論訪戴成奇事莫失扁舟我往來

簡施教授

梅花時節大闕情可若山村水館生取樂未應湏酒飲
忘言終不欠詩成合污尺寸多翻覆廢道毫芒即重輕
季攷月書開榜後思君官滿又將行

王禹偁贈呂通秘楚州監倉

聞君公事苦喧卑紅粟堆邊獨斂眉已有朝行翻掌庾
未知畿尉且吟詩

君前任
畿縣

堰頭笑傲同張祜市裏優游

比路隨唯有才名藏不得山陽留滯肯多時

王教授

赤城霞抱玉麒麟
祖業傳芳信有人
占得倫魁到名第
會將經濟取通津
我歸邂逅情如舊
君去相思話更新
燕麥風搖梅熟雨
為吟初度紀佳辰

徐倅

稚山侍郎之子

二年清節照冰溪
一笑屏星興懶題
五月誕辰宜熟醉
九關雲路豈難躋
家傳學行元無恙
世濟聲華信可稽
邂逅從容何以祝
寸田尺宅理刀圭

示大兒峽州簽書判官

看兒遙宦離吾身吏在廉平穩問津積世衣冠當報國
隨時祿秩莫憂貧周旋同列防猜忌出入其間節怒嗔
滿眼江湖是三峽堂堂祖業有偏親

贈日者入浙

信城居士揚今古老大馳聲更不群只是陰陽與流轉
便能貴賤合知聞功名要以時難得賢哲惟夫命亦分
好事勞君過山澤因行為我看風雲

贈南屏潛講主

小樓經卷雜琴書落架蒲挑影碧踈施主去來多佛事
堂僧分散各清居戲臨米帖行吟后困理茶鐺出觀初
門外滿堤沽酒市誰看金鯽舊池魚

茶山贈遠老

一榻雲居十七年茶山香火了閑緣隨身竿木初無地
到手鈴槌亦信天喚起兩賢誰種竹來尋北郭我烹泉
塵塵刹刹衆生濁消得禪宗建法筵

寄淮聖僧元肇

風霜江浙又窮冬
瓶錫飄然寺寺鐘
爵服豈能三事衲
軒車多欠一枝筇
君先靈運當成佛
我比樊遲願學農
想得禪家人不到
山門惟有白雲封

送趙戶部迎侍回朝

朝回日日曉鶯邊
寶帶春風蹙繡韉
過眼任題紅葉句
放懷應點白雲篇
沉香亭北寧無地
群玉山頭別有天
更向紫微垣內去
衣冠文物是真仙

幾年高隱占南池
得路榮觀此一時
持節把麾今已了

握蘭簪筆未為遲
暫來舊里歡迎侍
便立新班好論思
莫論山人在空谷
為公猿鶴伴參差

送戴少望知軍入朝

二年人說戴江陰
五馬常存萬古心
肯以清朝為得路
豈開黃卷始知音
見聞雜陋由來久
音旨親承請自今
時世適然多出處
達觀鐘鼎等山林

送許鼓院入朝

九華風物想依然
一隔星霜近十年
方喜因依二天庇

又看歸觀五雲邊
踰踰朝士推賢業
穆穆虛皇待奏篇
收取功名上臺閣
人間誰不羨登仙

送潘舍人護客

往來試與護氈裘
淮水湯湯江水流
霜雪馬頭應北望
風烟舟尾且南遊
皇華使節名方起
天寵廉車爵更優
翰墨場中真矍鑠
壯懷能賦亦封侯

重送潘舍人

雪裏春風使者舟
萬釘橫帶紫綺裘
王人自占諸侯上

漢使何妨絕塞遊
鐵甕城頭過京口
金山江外是揚州
宮桃御柳開時候
黃道歸來拜冕旒

送富陽曾丞

富春山下好哦詩
訪古懷賢亦自奇
孫祖墓荒猶寵從
嚴陵臺在更淪漪
鯉庭僎次真為樂
鳳闕趨朝信有期
一棹潮風解袂暑
石橋秋近足歸思

送施寺丞筠州

江西道院少迴旋
蚤晚依然省部遷
教子既同分竹虎

傳家元自冠金蟬向來朝闕看飛珮此去名藩好著鞭

八百洞開應一笑遊閒更與問黃僊

李八百洞黃仙
觀皆在都市

送何學諭赴江西陳漕之招

籬邊無菊可清尊又見行人別我門隨意一杯非暢飲
徒知九日欲何言寒煙淮塞干戈滿野路江村鳥雀喧
滕閣迴臨雲雨上好依英蕩說丘園

子壽從金陵之招

白下長干亦舊遊十年重到喜依劉幕中籌策無非事

江左衣冠有勝流，滿路梅花春信動。
一篙波影頌聲浮，從來知己何難易。
贏得榮名尚黑頭。

送推官攝邑鉛山

準擬新涼共酒卮，溪山到處少清詩。
何年結社得如此，比日登樓已可知。
製邑且分蓮幕去，鳴琴應負錦囊隨。
鵞湖石井青楓峽，又近淵明把菊時。

吳推官權永豐

乾封搖落西風起，忽憶故人何處詩。
白髮居頭空自笑。

青山到眼望都疑尋常蓮幕知難近邂逅絃歌豈易為
若見趙舒煩問訊晚禾方得雨垂垂

徐和卿潘文叔溪樓夜飲因送之永豐

良天佳月共中秋綠水青山一倚樓今古情懷只如此
幾多杯酒可銷愁得隨撰杖平生願又向乾封數日留
湖海交遊難定準眼明烟鳥下滄州

送八姪赴調借仲和兄所贈詩韻

莫忘前人食息間好將祿養奉親歡愧予行淺無堪法

幸子時尊能効官經緯家聲元自好棟梁門戶各相看
西風喜送吳中去年少加鞭信不難

送伯輝之官德興

愛惜吾民為國憂錙銖尺寸本征求勿輕朱墨勾稽日
當重金繒講解秋奮起儒科多意氣養成人物轉風流
竹林回首琴書地猿嘯鶴鳴山翠浮

送吳主簿之官

上饒有路達松陽江淞隣封只異鄉幾載玉峯超霧重

一朝蒼嶺惠雲長，決科意氣能相過。
隨世功名合自彊，高士不為何太甚。
且稽絲粟恐民傷。

送孟元立之官行都酒所

行色西風入帝城，新涼吹稻雨開晴。
月明茅店五更夢，潮上溪船千里程。
老覺依依人去住，閑思一一我經行。
功名意氣雲霄路，冠劍鏘然佩玉聲。

送成季

案此詩五首其三
首見七言絕句

經月紅塵共小樓，西風吹夢遶湖流。
文場兩地還趨走，

客路他鄉有去留壯日功名看輦路老年心緒喜滄州
北關門外一杯酒潮水廟山灘上舟

秋日烘林富桂花筵輿應過野人家青山路口望烏石
綠水渡頭行白沙里社遊從情最樂弟兄團聚興無涯
重陽天氣君歸去賸醉芳尊詠物華

送莊賢良自鍾山歸鏡山

邂逅薰風醉酒壺秋聲俄已到菰蒲扁舟西笑遊鍾阜
穠載東還入鏡湖尚友更思狂客不受閑時過放翁無

壯心老矣詩情在滿眼雲山道轉孤

送曾鴻甫著作還朝

進退非關我重輕鄉來何屢乞青城西風又上蓬山去
指日須為政地行衛霍功名思滅敵成康時世欲持平
西湖之上煙波濶回首能令眼倍明

送耿宰屬浙漕秋試

傾壺玉澗金波委天地中間惜九秋跬步往來空躑躅
何心出處試綢繆柯山風葉無樵斧湍石煙簑有釣舟

鴻鴈初飛吳越冷震風堆雪卷潮頭

送仲至罷歸

纔得公來又見歸
淞江瀾眇越山微
岸花汀草依然是
官柳宮槐頓爾非
朝路往還從舊少
詩家識賞至今稀
西興渡口斜暉裏
儘好風帆漿棹飛

送溫尉赴調

富春山下賞花時
夜半潮生醉不知
人事變遷驚易老
歲華荏苒歎多奇
風聲野樹吹殘葉
雪意江梅發好枝

且喜彈冠天上去舊登臨處為題詩

送章撫幹兼寄皇甫襄陽

薰風幕府上隆中想見旌旗照日峰絕塞江山元自若
故都京洛豈難通古今只有時艱阻賢否寧無志不同
羊陸規模亦深遠因言為我寄元戎

折南礪早梅送周國正

送客逢花小棹飛折來誰與歲寒期老身不忍看千樹
明眼須容薦一枝意象春融知玩索咏歌物妙想舒遲

孤高比玉人之德公豈尋香逐色思

送伯臯入書院

江湖契闊四年別澗谷經行五日留
撲撲落落梅啼鳥換離離荒草昔人愁
餘寒漫自青山老稍霽當同綠水遊
不羨章泉能薦禰却忻半隱得依劉

送施知院洪帥

便好槐庭聽報麻少遲江右建高牙
使華仕路應爭羨畫繡鄉閭合共誇
別院笙歌開祖席滿城桃李正飛花

不知誰下陳蕃榻且看兒童竹馬遮

送辛帥三山

暫着鵷行却建牙此身何地不為家
閩山又作年時夢吳會分明眼底花
舒卷壯懷公自笑往來行李士爭誇
棠陰應有邦人望笳鼓西風擁帥華

送余解元再往吳中

西湖浙右多佳士為我春風各寄聲
睡閣有閒當領略癰庵因過試經行
終年離索非人事它日相思不世情

更是吳王舊池館桃紅李白草初生

送陳同甫丈赴省

癸丑正月十六日

平生四海幾過從晚向閩山訪海翁
又見稼軒趨召節却隨舉子赴南宮
風雲變態高情表歲月侵尋醉眼中
可是龍川便真隱乘時勲業尚須公

送徐仙遊赴省

得雋春風有世科西湖花柳奈君何
會逢舊治經行久相與陳人笑語多
快睹揮毫明禮樂不須製錦更弦歌

開禧正以才經濟臺閣中間要講磨

送耿師幹得閣門

羽儀上閣拱清班天近紅雲咫尺間禮集會朝馳北闕
祥開壽節頌南山龍鸞鞭扇隨分合鵷鷺衣冠得往還
休沐定從湖寺去人生誰不有忙閒

送余運管入浙

日邊護漕建臺深滌路長才入壯心正是規恢要多士
須知汲引有知音向來除夜嘗同賦此別何時復盍簪

好上鴛行參劍佩為言風雪老山林

送上饒韓宰官滿歸東陽

三年製錦見能賢秩滿歸來寶婺邊
族閭是非無不爾位高翻覆有如然
莫因別派妨隨牒且念前聞穩著鞭
北客相家今幾許堂堂忠獻自凌煙

光庭得節同彥章置酒江亭作別

青山吳越晚潮天領客登臨合醉眠
且抱風流尋酒盞更移襟度入詩編
鴈行未許歸舟速鳳闕猶看使節旋

處士一星人物表往來書劍本超然

送沅陵宋令之官

雪殘沙軟草芽肥
梅萼翻簷柳拂堤
山色翠連盤瓠石
水聲清接武陵溪
要看撫字歸談笑
且與經行試品題
我亦錢塘江上去
書林猿鶴共淒淒

送雙井三哥

清暑錢塘舶趁風
潮隨帆影度空濛
不妨放浪江山外
應笑驅馳朝市中年少
綠衣宜養志時平
黃卷合書功

南來桐樹彫零甚喜子清揚趣不同

送趙清江

少勞吟筆賦催科撫字心存政自和莫道折揚無俗韻
要思于為有奇歌時秋涼冷遽如許客子宦遊將奈何
看即雙鳬候飛鳥清江江上一婆婆

送孟五六哥

惜別經年事已非悔於塗炭坐朝衣放身滄海未為失
滿目青山胡不歸零落交遊難聚集淒涼族緒易因依

有來少住為佳爾老我逃虛甘息機

送芮玉山

茗溪秋碧卞峰濃
蓴菜鱸魚興味中
製錦歸來應自適
角巾行往與誰同
才華便合為時用
士論須知得譽隆
留取棠陰在
嘉邑為公頻到詠仁風

送王寺簿倅秩滿回蘄

澗頭連雨水還平
岸草縱橫日日生
過眼空林惟鳥影
驚心匝地轉蛙聲
病多止酒慵尋句
老矣焚香喜誦經

見說玉溪王別駕二年官滿又將行

百年駐蹕在東南薄宦浮生士所諳進退何心空自了
別離滿眼我難堪救時事業終湏做隨世功名亦喜談
命也奈何天咫尺鸞臺鳳閣本潭潭

淮山何處是蘄春想見家林猿鶴新合上烟霄輸壯志
却分風月又閉身極知歸去無多日細數交游有幾人
江左夷吾誰得似急乘溫詔起經綸

蓋稀之作烏程縣

十年重入長安市常把西林倒載人少為弦歌看撫字
莫須盃酒話酸辛三賢夕覺兩無有千首何如一已真
禿髮顧予皆老矣朝家更化孰知津

已未秋潘德久蓋希之姜堯章同住

西林看木犀潘姜已下世三年矣

鄭中卿池陽倅貳

九華秀出明秋浦暑雨吹涼樹色新彈壓江山非俗輩
平分風月有詩人經行古寺心情別放步空村語笑親
安得酒邊看近作白頭青眼話鱸蓴

錢宗卿得當塗守

垂上甘泉玉笋班又看均逸賀朱幡
當塗自是號名郡近北還知出異恩
西望雪堂應坐嘯東連鍾阜要蕃宣
名卿所至人皆仰青鏡從渠霜鬢繁

朱敬之監簿求泉南添差倅去泊靈芝

經筵雖舊事猶新似續中朝入薦紳
便賦泉山六百石重光唐石八千春
從來力量非他意到了工夫只此身
六月靈芝湖上寺風涼相與洗車塵

何學諭隨黃守靖州

雨涼吹動木犀天
莫遣清愁掉酒船
獨擁琴書去何處
又隨符竹到窮邊
區區事業皆身外
往往情懷只眼前
指點瀟湘在圖畫
有詩無負好風煙

成外歸秣陵

看了三山白鷺洲
歸來難老更何愁
弟兄舊隱家風在
子侄世科官業脩
魚計亭深雲塢口
青氍堂迥水塘頭
何時容我陪情話
華髮清樽事事幽

趙七哥歸併呈乃翁

前時秋熟不能留愧此常生間闊愁見說長翁游隔郡
欣從重客到吾州阿咸唁戚因迂步諸友適來如合謀
居士聞斯須大笑閒中離合等浮漚

石尉歸杭

吳越青山日日潮魚龍出没浪花驕乾坤莽蕩盤今古
賢否交馳迫市朝我有詩書心自得人無風月意難消
三年尉滿歸天路柳色爭春梅未飄

孤山梅與玉溪梅溪上山根歲歲開歸到鄉關須領畧
相逢官路且裴褰無非共醉窮冬景其奈他吟處士來
籬落園林浮動處定應回首我塵埃

文叔解官東歸

一帆風雨轉吳頭家在稽山事事幽小試鳴琴還滿去
等閑結綬亦何求政聲贏得多推美學力須知轉好脩
我與君心似相密別離無計可消愁

送鍾親昆仲回四明

一棹拖蓬過甬東潮平波面夕陽紅極知我輩焚舟舉
更喜君家製錦功楓葉未殘秋淡蕩桂花猶共月朦朧
相逢莫恨相離別連壁應搏九萬風

浮生車馬易西東邂逅相看醉頰紅失喜却愁詩作祟
推愁猶喜酒書功秋老水風吹浩蕩夜深山月照朦朧
年來墨客驚無幾四座當回正始風

文叔赴部班引復回建康

俯循常調到行都薄宦猶煩五薦書久歷男邦雖不較

更臨郡縣待何如春風吹鬢秦淮老夏日移家越嶺居
且以酒澆君磊塊相逢誰道故人踈

劉簿檄自安仁回泊天寧

王石村前捧檄來冰溪蘭若小徘徊因僧定可了禪悅
與俗何能辜雅懷秋到山林風未脫涼生絺綌雨須催
遙知有句曾吟不想象章泉更樂哉

二十六日昌甫歸章泉水

城郭山林每相望獨醒那忍共春醒眼前人事忙如戲

脚底花時過若驚從宦索居良易與新知故態豈難評
竭來數日還歸去隱地應多怨鶴迎

仲至除帑轄後移居

駸駸得路又遷居廣厦夷塗不奈渠賈島并州雖客舍
陶潛栗里祇吾廬推敲終久誠無恙揀擇湏臾便有餘
但願朝回飽喫飯時能唐突過黃初

送合州青陽道人

靈元一點結胎胞識取陰陽氣象交具體無過乾六畫

施功全自震初爻玉池金室歸真境紫府丹臺近樂郊
更有些兒玄牝物青城山頂約誅茅

同遊山前道院訪晉陵道士

閒思羽客約詩人覓徧幽窻到竹陰天近地嚴偏寶笈
道通僊隱得清琴因成行去憑虛望不見歸來何許尋
珎重同遊先寫句薰風城市有山林

別靈耀寺同舍

分明共學要工夫欲話離情一句無肯把閑愁消日月

從教身世老江湖晴雲野岫明霜樹寒日平川濕露蕪
去去杜門思益友只今搔首更踟躕

別子似

眼底年華此一時相逢意氣得追隨清風朗月閒傾酒
流水高山漫賦詩我已衰遲君莫問君宜光大我深知
人間萬事邯鄲夢海內交遊不記誰


別許叔開胡彥道併呈曾正中

連天風雪滯行舟更為親朋一日留搜索新詩供大笑

旋沽濁酒洗離愁
江橫水館漁村靜
山鎖僧房茅舍幽
抖擻三年塵土夢
片帆西上玉溪頭

伯臯過筠陽甚惜其行

知君又爾去筠陽
山路窮冬正雪霜
華髮相看俱老大
清言誰復共平章
梅花破暖開何處
楓葉凋寒落異鄉
雁影翩翩鷗烟烟
惜無餘地問行藏



欽定四庫全書

集部

澗泉集卷十三

詳校官庶吉士臣吳烜

主事臣呂雲棟覆勘

謄錄監生臣周謨揚

謄錄貢生臣黃琮

欽定四庫全書

澗泉集卷十三

宋 韓澆 撰

七言律詩

趙太社出示夕月齋宮所作次韻報之

年時過我澗之南寂寞寬閒所共堪
此道吾儕非自苦人情物態是誰諳
灰心縱惜形容變餬口猶圖齒頰甘
且和湖邊夕月句老生無奈只常談

次韻宋倅

見說空堂舍蓋公秋深得雨慶時豐喚回舊觀十年外
聚集清流一座中臺映玉峯歸獨鶴城依水水下孤鴻
只消滿把籬邊菊賓主風流意已通

海內交游不數公又吟名勝句何豐錦囊忽到溪山下
綉段爭看澗谷中落拓自驚隨野馬淒涼何止聽賓鴻
高齋容我陪珠履不信窮途有路通

次韻元要陪倉使張園

春閒有客伴遨頭應喜園亭處處晴日暖風花影外

清歌妙舞酒船浮
牢籠好景開詩膽
愛惜流光入醉眸
珍重蘇門兩君子
至今人物尚同遊

次韻昌甫所寄

別後連綿好句來
朗哦深視百千迴
窮通身外庸何恨
生死人間信可哀
公既愛閒常隱几
我方瘡楚未持杯
澗梅點點從教白
春到章泉花自催

飛舞醞鷄只甕天
何知老壯與窮堅
于今之世宜咸若
從古之賢定復然
荷盡菊殘非一日
草深地僻幾多年

吟窓明暗霜須雪苟亦無言豈舍旃

催景陰陽長短宵天回星紀又玄枵霜寒草野真無惡
雨濕禾場正不聊薄晚固宜山色遠經冬猶未水痕銷
私家一飽官何恤寂寂閒中歲月飄

次韻昌甫

香來桂樹叢生處招隱其如懷玉東白髮滿頭唯我獨
清詩脫手幾人同影搖明淨雲間月聲滴幽微雨後風
秋以此花相勞苦世塗誰拙又誰工

故人北客今多少但願上下常相隨
此時一出得聚首
此日獨居還和詩我家父祖不相見
君家兄弟誠所思
玉溪屈指已三世霜風落葉吹疎籬

既貧且病是今年容貌音聲亦變遷
縱起步趨終倦矣
訥於言語每頽然秋涼頗似如人意
月好翻能攪我眠
試把閑情和佳句瑞峯何處入章泉

秋來風葉已紛披景到懷人意可知
時泰果能同道泰
行危何必更身危獨憐水後渾休說
相與山間是寄詩

空眄庭柯又如許彼陶終是得顏怡

我園雖荒亦有梅云何也會待春回尋香逐色從頭數
弄藥攀條著眼催老境隙光真野馬新年律琯已飛灰
一枝千樹俱能爾莫負尊前得句來

我園雖荒亦有梅相隨酬唱謂何哉須知流水孤村外
儘有清風明月來幽艷肯因人意發好花元是化工栽
幾番立盡空行去猶記西湖挈杖回

交遊零落舊同盟望望章泉共此情病後如斯猶得句

老來應不要知名久於朝市鬧中住便合山林靜處行
今歲雪多梅更好巡簷宜與細逢迎

看梅動是隔年期僧寺逢花正此時火撥白灰相對榻
酒傾清醪亦盈卮幽幽寒事空如夢歷歷閒情獨寄詩
憐我倦遊還薄宦南枝和雪又紛披

何處逢人可共杯老來空覺歲時催門前塗路無芳草
山裏林園欲放梅殘雪未消經小至繁霜猶凍待春回
好詩寄自章泉水起我寒心一寸灰

老覺浮生空地隔時來猶幸得書題夢思百里身長遯
語別經年意轉淒槐葉易風驚熱惱蓮根少水厭塗泥
何當整履蒼苔滑嘯竹高涼手重攜

歎息彌襟強拄撐人間閒處且閒行風光漫與酬詩債
歲月何堪說宦情近脫市朝誰信我久居荒野孰如兄
青青又滿新成竹相望章泉夜月明

盡道龐公遺以安笋林上番又成竿幾年手種要誰問
常日身閒只自看墨妙席間殊不惡茶甘林下莫留殘

荒尋幽討真空舉今世孤風世所難

僅得從容亦素期意消心愜恨來遲相將里舍歡言酒
珍重家庭聽說詩落珮倒冠非所籍毀車殺馬尚何思
從來鵬鷃變蚊耳不怨人之有佚遺

次韻昌甫見寄

薄宦歸來盍罷休閒心終是愛吾州高名又喜為澄觀
素隱何妨得臥遊四海九州彫落盡東鄰西舍往來不
秋風山裏相尋處莫問人間有比周

次韻昌甫聞予過仲益見寄

離羣常恨不能佳
桂到秋深處處花
幽討既尋泉水矣
傍搜豈忘月軒耶
翁留觴酌時煨栗
友為壚熏更作茶
不是襟期安得此
世間餘事我何加

次韻昌甫別後所寄

多病登臺畏獨醒
荒園藥菊尚青青
山中我友還新別
門外巾車亦始停
老去年年無以醉
詩來字字信斯馨
遙知隱地秋風急
坐對松寒數鶴翎

二十五日次韻昌甫別後所寄

九十里山寬兩程白雲隨步不辜行石嵌塘水觀魚躍
土曠田塍放鶴鳴兄弟留連因共集兒孫問勞笑相迎
歸家轉覺深居簡強把柴門更拄撐

山淨泉甘草樹香書楹茶具酒壺觴故家南渡衣冠少
前輩中原文獻長朝野從先終較別衰榮到底未須忙
高風且作閑言會時寄連篇復斷章

昌甫寄所和朴翁詩因亦次韻

長日懷賢只坐馳炎涼誰與世推移
貧生夢枕槐柯蟻笑殺仙巢蓮葉龜
蕭瑟兩峯吟和處辛勤千里寄來時
風流是我身名事付與劉郎歌竹枝

次韻徐子顏丈

老覺年光秋更好人間從昔易紛紜
漫將詩酒供閒客常喜山林對隱君
話到忘言清似水思之何事嬾於雲
相逢得醉茱萸盞一段高風信不羣

次韻耿運幹

如君便合上鵝行却愛湖邊梅蕊香盡把珠璣為妙手
誰疑鐵石作剛腸文園病減初何苦金谷春歸有底忙
我亦被花惱不徹又因鼎鬻得珎嘗

次韻民瞻

獨酌梅花醉似泥市塵何敢近園扉孤香藉雨知幽眇
冷艷排風與世違燈火麗譙新氣象琴尊高隱久光輝
隔江相望空華髮燕子將來鴈欲歸

次韻余季倫

興寄寥寥豈尚同
詩歌往往嬾求工
從他漢魏曹劉上
盡爾齊梁沈謝中
百巧百窮無似我
一觴一咏有如公
今來古往能言者
多少焦琴爨下桐

次韻鞏仲至

青青客舍付離騷
歲月崢嶸又一朝
不奈驅馳墮烟海
少遲盤礴對風潮
彈冠自笑平生拙
落筆誰容萬景驕
秋入壯懷探禹穴
吳天回首越山遙

次韻周景瑜

日日鉏園淨掃門待尋幽草藝芳蓀秋花又滿庭前樹
濁酒閒開座上尊新事任從千百變舊交纔得兩三番
淒涼北客溪南住有句長吟莫厭繁

二十三日次韻斯遠

閒身襟抱為君開山已高深水漫洄趁得春時花下飲
猶思秋夜月中來留連自覺太多事潦倒相從更幾回
詩到唱酬成宛轉悠悠今古復關懷

吳子似以長句為贈次韻

金石錄卷十三
玉石村船子欲歸相逢只合醉如泥平生學識知何患
隨世功名信不迷浪飲未應愁劑量放言寧復究端倪
象山經得堂之記出處升沈惜此題

次韻王教授

春殘物物尚堪書捉筆尋詩獨遶廬不特唱酬渾老也
未知交往盡歡歟怕將笑口荒忙合欲待愁眉款曲舒
忽爾流風萍是絮宜乎化氣鼠為鴛

次韻同訪潘丈

風流儒雅古難并
自昔從公意氣傾
已覺好詩銷永夜
正宜小閣快新晴
推琴置酒情何適
取帖披圖論更精
當代如斯真可數
一潮烟棹我將行

次韻抱樸君問病求閒

臥病兩月
丐祠未許

清都誰不願居官
且是西湖最好山
此地固難常養病
他鄉只可便求閒
苦無筋力追王貢
那有心機銜孔顏
秋入兩峯明碧落
幾多鷓鴣簇天關

次韻孫叔晦

春陰漠漠晚來寒欲寫相思一字難古錦詩囊無我佩
暗塵絃索尚誰彈閒乘野逸神尤旺靜少牢愁夢亦安
好爵浮名能有幾人間翻覆自悲歡

正旦次韻教器之所寄

笑倒興公賦遂初便尋前話豈無餘春秋列國乘軒鶴
耆舊襄陽縮項魚臘日未除曾舉酒春正還始尚堪書
嶺頭梅萼歸來晚湖海誰人更得如

次韻

孤山夏木已蒼蒼更著嵐光與水光擇勝軒牕尤有味
懷賢姓字轉生香湖陰漲霧歸雲靜海氣吹風卷雨忙
恨不相從飫蔬食細吟疇唱亦清涼

周景瑜同楊伯升見過次景瑜所贈伯升韻

風流二士真連壁乃爾行春到澗濱小坐縱談前後事
推賢因數古今人却思尊酒青燈夕殊覺頭顱白髮新
得醉有閒誠可味此情終不負吾身

世昌攜項平甫所和詩來歎其已逝次韻一首

只宜鄉黨與州閭天下英名不可居奮迅臨邊雖似壯
差池退隱實非踈紛紛雖滿庸人見歷歷難逃識者書
晚對匡山應自笑却將心事賦兵車

次韻德脩

已接湖頭笑語香雨餘又得句生涼分明天意如人意
占盡山光與水光朝市虛囂還隔遠軒亭閑雅信深長
輸君少袖弦歌手此樂吾儕亦未央

九月二十五日仲至攜酒與客相過因為作生

日次韻春時所贈

名勝相從餐菊英，楚騷情味是三生。
會逢其適論奇字，進退之間付濯纓。
覽德鳳凰非苟集，俟秋蟋蟀也須鳴。
誕彌俾爾耆而艾，况復村酤煮芋羹。

次韻上饒

一抹紅橋卧水雲，雨收風葉尚沾巾。
開門覓句無餘日，曲水流盃又浹旬。
春事匆匆容易老，人情往往總輸真。
河陽縣裏花千樹，猶記溪南寂寞濱。

次韻余伯臯

蕭然一葉下庭空，便覺風涼入袖中。
餬口可能盂飯白，放身那羨帶鞵紅。
江湖水滿悲遊子，城闕秋生醉禿翁。
且剥鴻頭對杯酌，翻雲覆雨久來同。

與君莫放酒杯空，是事無過一笑中。
衮衮細看誰眼白，休休贏得自顏紅。
世間爵服無歸客，天下漁蓑有釣翁。
飲罷不知今古異，酣然而睡且相同。

視民如傷書呈上饒因其詩次韻

此話休嘲道學殘憂時當復寸心丹扶溝在昔多遺緒
西伯於前實肇端縣邑豈皆椎剝甚民農惟獨撫摩寬
因公善治重拈起侑坐誰圖作美觀

上饒新刊鞏宋齊六言寄趙曼叟者次韻上饒
凋零我亦鬢星星舊墨新刊百念輕詩案自應留筆研
書窓誰不對梅瓶趙岐交契身俱老李漢親傳眼獨明
贏得泉溪春草綠離離煙水照墳清

聞張饒縣有詩次韻

絕俗尋幽豈好奇章泉不信更何之仁賢固曰能親炙
交伴要之豈詭隨去泊玉田雖宿雨回程冷水喜晴颺
那知更著張饒縣風雅還吟五字詩

次韻校官

要底勞生醉即休從他勢利有包羞秋高野外空環堵
月滿城時定倚樓平揖山光明絕巘淨搖谿影轉滄洲
可憐兒輩知陶寫絲竹何如且茗甌

次韻趙路分

落盡籬前一樹梅，海棠禁冷未全開。
待晴自歷郊原去，苦雨誰從澗壑來。
近喜交遊能好句，即須解后與深盃。
佳人望斷碧雲合，九十日春餘幾哉。

次韻次公

漲雲吹雨轉輕雷，香草沿階芍藥開。
正好青春乃奔走，只宜白日且徘徊。
離懷未說人千里，撫事渾如水一杯。
酒到多時詩定少，渭城絕唱復誰哉。

山人常抱白雲眠，夢想雲林竹樹邊。
恨不一杯同卜夜，

情知七字獨吟天由來里社無非舊細數交遊有是賢
茗事肯隨人共煮樵漁真足豁憂煎

次韻

西風吹雨動雲車野水浮花遶屋除得興無過尋舊約
稱心尤覺是閒居市塵不到秋聲早樹色初分夜氣餘
架上古書吾輩事一襟清暑為躊躇

次韻昌甫

竹窓寒夜雪宜聽澗道柴荆曉更局那得擁爐傾白墮

且為數息問黃寧輿籃輿可知人勝落紙詩尤見德馨
臘日尋常豈能爾梅兄於我眼終青

次仲至

望斷湖山水西君來我亦醉如泥只宜吏隱歌仍嘯
莫問兒饑號與啼巷仄人家隨地轉庭空花草傍簷齊
樓高又倚秋風老待把君詩處處題

冷烟無計了愁端花滿湖陰百頃寬渺邈家山身獨老
周迴園館眼長寒吹飭近市徒誇賣上冢何人不鮮歡

空對海棠春睡足數枝紅濕露溥溥

仲至舉似項平甫所贈宦漢陽教官時也次韻

文獻相傳有父兄山堂留得是詩情果回富豔歸清遠
盡掃虛驕入正平保社祇今難可繼贈言如昔信堪驚
漢陽歷歷晴川樹鸚鵡洲前黃鶴鳴

次韻亨中見寄

團源深處有幽期誰見壺林杜德機曳履信知貧不病
采薇空論怨還非前時解榻臨風處半夜呼杯踏月歸

吟到菊花須再會落霞孤鶩已秋飛

次韻潘德久見寄

歎息騷人不我違常同醉酒把花枝如今但得流傳賦
已久都無唱和詩甌粵州間臨去日永嘉鄉井入朝時
相思屈指秋鴻近空使揮絃目送知

次韻陳膚仲又過鉛山見寄兼懷真卿丈

海內師門復幾人書來善誘意循循休論用舍與斯世
試較仙凡隔彼塵是道淵淵書自若相傳本本話常新

三山想像陳黃學五馬歸來各素貧

借章泉翁韻回齋

狂瀾正倒築新齋回我家聲屬雅懷想到淵源深徹底
窺從涯涘溜浮堦舜文正道須身見佛老他岐定力排
今古沈浮幾多少滔滔應不與之偕

次韻次公

梅花臘後與春前爆竹聲中更恍然來往南山驚漸老
唱酬東郭信能賢風流往事高情外雅淡新知醉眼邊

盡日論文君慷慨因時寫物我纏綿

趙倅再賦又次韻答

閒却身心墮一偏從渠佳月更涼天每思君子宜看竹
設道宜男誰戴萱寂寂故鄉通德里悠悠往行孝廉船
江南過夏多梅雨賦就郊居空放言

次公和韻再賦答之

雨煙埋却面前山悵望高吟祇自看既以酒壺相煖熟
更因墨帖破荒寒誰家籬落梅千點到處園林竹數竿

不是故人心事在也隨塵慮失幽歡

荅行甫

檢點歸裝有句無一樓晴日照堦除提瓶洗盃猶堪醉
破研搖毫亦可書江水東流挾湖海家山西上接匡廬
軒然握手春風裡刎頸從來笑耳餘

次韻蔣縣尉

霜風歲暮正深幽喜見才華譽甚休古者重交多管鮑
今之能賦少應劉枯榮到底俱塵網起滅由來付海漚

撥盡寒爐既相覓恨無肥馬共輕裘

次韻鞏帑轄

省事遙知多杜門擁爐尋睡定溫溫年來尚喜常同賦
日近還當不復言畧去便回須管學可行時止是丘園
雪寒江淺潮頭小舟到泉溪春已暄

次韻伯臯至日

眼中林密更山深昧昧從前直至今且與兒童誇好節
豈無交友話閒心繁霜似雪空疑畫盡日移時肯廢吟

歡喜有詩余半隱遍遊朝市却山林

昌甫詩叙同僚以皆為南岳監也昌甫秩滿又重請於廟堂矣次韻少篤仕契

詩寄同僚意有餘清朝猶有此差除悠悠道室仍祠廟
衮衮金坡盡石渠會弁假饒方寸地折鐺消得斗升儲
要之因任榮堂帖員外空餐獨愧予

又次趙倅五日即事韻

水斷浮梁地愈偏山人不記艾花天深林礙屋猶多竹

積翠滿庭無復萱蒸溽既難尋筆硯荒涼豈易飲舫船
不因別乘離騷句那得斯時有是言

次韻貴池兄見寄

違離伯氏五年矣又得春風一紙書老去光陰非舊比
閒中滋味是真如鳴琴且喜身無恙著句遙知興有餘
夢遶齊山堤上路萬花飛樹綠扶疎

赴貴池臨別呈景清兄

試吏齊山敢作難相看風雪去途彈客情已覺自無緒

子職不知誰問安親老豈禁成遠別我思只合且團樂
三年願得各強健贏得歸來滿室歡

歲暮和韻甚思昌甫兄

風雨空山可奈何門前寒港水增波君多親戚定歡宴
我乏從游徒浩歌歲晚一身知又老年來三友僅相過
章泉超在百里外應自打乖安樂窩

次韻伯臯見別

半世交遊獨有君春風桃李滿溪濱數杯別酒同舟去

一種離情兩路分
從昔早衰陶靖節
只今多病沈休文
浮名絆此身
何用醉眼睛
空靄靄雲

次韻晁元默和李季章叅政長句因寄呈李叅

雅懷何地不為春
弭節臨川亦載欣
萬事悠悠俱昨夢
一身落落掩前聞
山焚玉石何難辨
水雜淄澠未易分

喜見故家新築就
試看靈谷賦煙雲

元默新築李叅過之甚款

髣髴風流轉小車
洛中情味尚誰家
江湖水滿無飛鴈
城郭春深有亂鴉
且自山間更林下
從渠地角是天涯

不因勝事那能此一色紅紅白白花

昌甫有詩琴士云得之黃子厚蓋考亭坐中客也
也因入章泉同出城解后和韻

青春深處見揮絃吟到情時恨更牽舊話相逢真夢爾
故人獨覺倍依然穀城大雅空三嘆雲谷斯文已百年
珍重散庵因一笑鬢絲禪榻羨同眠

昌甫謝徐倅行縣因到山中次韻呈徐

章水泉頭春雨晴尋幽都騎眼須明固知地勝因人重

要是村深少客行，飲散軒窗雖寂寞。
歸餘草樹亦敷榮，清風洗盡塵間俗。
忻慕誰云只晏嬰。

元日次韻紹之

相從湖海逢元日，且與清吟作好春。
病起喜能閒散步，客中翻得靜怡神。
寒侵是處梅枝晚，雪洗四邊山色真。
信道吾生有餘味，一瓢歸去久甘貧。

次韻昌甫寒食

歲歲春深上冢時，擔頭挑酒紙錢垂。
橫鋪嫩草松間出，

亂點繁花水面吹扶幼不知今潦倒悼亡應嘆昔追隨
夕陽雨後歸來路杜宇聲頻落燕泥

三年寒食在天涯老覺心情不為花細雨隨風初語燕
亂雲藏日欲歸鴉無才聖世空狂望有命王城莫苦嗟
南北兩山青草徧故園疑並野人家

寒食同為異鄉客欲尋杯酒話花時豈無它可傾三盞
那有閒能把一枝衮衮市朝徒勢隔荒荒湖海付心知
牡丹天氣金箋在華髮居頭且送詩

次韻上饒見懷蒼簑

風流天上張公子又得清樽聚一堂眇眇高人懷栗里
悠悠佳夢付巫陽休論明月黃花曲共約春時曲水觴
小醉醒來我何有荒亭秋竹漫蒼簑

比年秋滿言歸以四季木犀瑞香二花贈徐和
卿再來調官和卿有作因次韻

年時我亦治行裝曾寄閒葩兩種香一別人猶得相見
再來花更不能忘春風披拂依依紫秋露淒迷冉冉黃

深巷逍遙昔居此騷吟先後味何長

次韻子似同過九峯因遊中園

君遊城市却山林與我秋晴一日行
來坐村庵天欲暮歸從野寺月還明
時尋小榼傾殘酒更覓寒花嗅落英
此意相從信無幾絕憐風度各詩成

趙倅同守作太乙醮禱雨次其韻

雲車在望已多陰想見東皇識此心
城闕步虛環珮冷田廬望歲桔槔深
天高地下羣龍起雷動風行萬馬駁

午夜寶章昭格處願言三日便為霖

初十日婺源得雨呈鄭宰

蠶麥登時天氣晴農田水利復闢情纔看令尹靈祠禱
喜見閭閻甘雨傾宣境飛蝗猶猛虎淮壩小醜致饑氓
經從治國吾何幸一枕新涼更解醒

次韻犁春

世間何處不埃塵百巧爭如付一真固蒂深根元屬我
隨波逐浪也由人狂風驟雨時常有野草閑花日逐新

安得雪堂老居士同歌江上一犁春

舒彥升寄東阜詩次韻

朔風吹起雪成團東阜知誰可歲寒飯了行吟應杖屨
客來因酒置杯盤彈冠結綬人皆易問舍求田我亦難
安得相從話疇昔但尋幽事博輕安

趙履道有詩因和韻

惜此郊原一日春高山山下葛溪濱聲傳遠樹知樵斧
影落橫波識釣輪步穩折花空到眼興闌啼鳥更藏身

與君扶路乘殘酒清夜醒來夢亦新

和昌甫寄衡州趙推官韻

遙遙石鼓是衡陽想見山長水更長世道只知天廣大
文章徒與日爭光飄零交友難重數偏塞閒愁嬾寄將
誰復汎蓮依蕩節好扶時運際明昌

和校官韻

登山臨水本何為又近橙黃橘綠時固是秋來多興爾
豈非月上一中之卧碑野處臺前字斷壁山民閣上詩

今古風流要人物可容吟嘯不伸眉

尹諫議秋懷昌甫以其韻賦之因亦和焉

秋風還起白雲吹草木悲哉亦變衰但覺乾坤閒外濶
未應日月閒中遲豐凶處處思逢歲窮達人人欲偶時
何似村居詩遣興柴門野老岸前籬

吾廬秋樹正蕭疎且爾依山帶郭居愁與世違空泥飲
苦無詩和也抄書意行謾曳雙穿履身懶常搖一敗輿
此外並皆閒骨董幾曾妄想待何如

爭名爭利路應填幽步須容我折旋一種空門心了義
八般奇語坐忘篇秋來野菊開金餅春去閒花落翠鈿
掃盡喧卑稀客到只聞猿鶴地尤偏

往來西舍復東鄰風約微嵐雨歛塵盡說世間多顯者
豈知山裏少閒人路逢僧道非無累家近漁樵定可親
貧賤難居貴難守任其商利與言緡

儒人從昔價連城籍籍紛紛可浪評力政既經秦六國
陳言多笑魯諸生怨纏楚此情何極秋絕商歌意未明

村晚忽驚黃葉墜又當尋取白鷗盟

牽牛花壓小垣牆落水澄江更草堂北客任天為世界
南遊何地不家鄉一官漫有蕭朱綬百計渾無陸賈裝
案上堆書真可老細哦清白洗肝腸

壯心空使鬢先華寂寂霜前水見沙功盡醉鄉元命世
名書文府且成家越裳未可輕秦缶羌笛何知咽塞笳
老覺悲秋甚無謂是非愚智不須嗟

冷淡秋光畫不成閑身贏得醉而醒水聲自與月俱白

山勢常知雲更青
廣大高明人孰辯
艱難險阻世曾經
著書固以窮愁後
陶冶多應出性靈

和民瞻所寄

老覺從遊易寂寥
夢思江海耿寒宵
元來冉冉乾坤裏
大抵悠悠歲月飄
南北一峯高可仰
東西二館隱誰招
園居好在帶湖水
冰雪春須積漸消

昌甫同過竹院和其韻

北客相從能幾家
故廬誰復話京華
君因父母思仍賦

我亦嫺嫺悵不譁竹院風煙元有地玉溪人物豈無涯
同來大半多先契凍雨吹寒濕岸沙

和昌甫韻

雲松雪竹野梅南敢謂歲寒之友三難弟難兄更佳句
閒人閒客漫游談竭來城郭如緣會依舊山林屬飽叅
我已行纏打包笠故家文物待重探

和昌甫見寄

歲晚溪南見舊遊歸輿常恨莫能留不堪別去人還遠

猶幸詩來路匪修
野外梅生花氣動
門前水折水聲流
相思清夢章泉上
盡道才名光更優

和周次公韻

籍籍春山德養尊
風行水上自成文
飽諳世故時高枕
強對交情日置樽
健句如君寧有謂
和篇於我愧無聞
敢言暑退秋生後
靜夜來敲月下門

和韻

老懷相別易依依
世變紛然是與非
縱得斗升聊復爾

便能尺寸竟何歸
澗橫流水桃花過
路遶他山柳絮飛
莫嘆征車我奔走
京塵應不到幽扉

次韻昌甫送周正子入太學

九月十一日

西風邂逅清揚婉
三歎章泉滿紙詩
取友此時宜自信
決科他日未為遲
賢關禮樂當深考
世路風波不用知
我亦飄零玉溪住
鄉評相與見於斯

和荅施教授

冷齋著我巽庵主
惜取禪心與法身
贏得閒官弄文字

豈容餘事亂吾真永嘉見說多前輩歸去要知必有鄰
野客靈山相邂逅他年拈起話還新

周六春伯教授四明

簿正麻姑已十年四明分教合騰騫如其推轂須臾爾
便以乘軒豈偶然金馬玉堂非一士蓬萊藏室盡羣仙
儒人本是經綸學少試義皇所畫編

周六以
易發科

廿二日施教授父生朝又有子入佛

賢關有子上雲梯更著談空說妙兒竇十郎於今可慶

龐居士在古為奇雙全福壽人皆仰三昧薰脩我獨知
春日千花記初度玉溪間客為聲詩

次韻推官東樓見懷

誰把新詩滿紙來登臨於我謂何哉地偏亦有閒情在
人老寧無笑口開溪山興寄留詩眼賓主風流落酒杯
昨夜秋聲已搖蕩月明中夜只徘徊

次韻昌甫九峯庵所寄

庵院誰人車馬來草生泥路石生苔塚邊只有千章木

山外寧無一點埃先友到時多感慨
孤兒知後轉悲摧
讀詩何忍賡酬去夜月吹涼曲岸隈

和黃靖州適軒韻

山中軒檻幾經秋誰得如公肯自由
既把旌旄開兩鎮
且因香火奉真遊
消磨景色棋成趣
排遣功名醉不憂
此話儘教兒輩覺
人生凡事豈難求

次韻德久懷玉山詩友

浙東山水幾多山公在家山定自閑
白髮肯拋詩卷外

清愁須著酒杯間，豈無興寄窮登覽？猶有心情記往還。
此道今人棄如土，翻疑逸駕未容扳。

和韻沙坑

交遊閒處可忘年，寒日江村西稻田。城郭喜離墟市外，
人家猶在石巖邊。詩翁言句非嗟若，墨客心情豈舍旃。
我亦沙坑舊酬唱，掩關空抱白雲眠。

次韻鞏仲至登樓見懷

東望悠悠我所思，老當益壯尚知期。極知後會相思日，

應話前因欲別時往事是誰人去住浮榮徒自位高卑
仲宣樓上春風裏只好疎簾看奕棋

| | | | | | | | |
|--|--|--|--|--|--|--|--|
| | | | | | | | |
|--|--|--|--|--|--|--|--|